


玉暉堂詩集  
二





叢書集成

初編

主編者  
王雲五

商務印書館發行

編主五雲王  
編初成集書叢  
集詩堂暉玉  
冊二

中華民國二十六年六月初版

著者 趙 淇

發行人 王 雲 五  
上海河南路

印刷所 商 務 印 書 館  
上海河南路

發行所 商 務 印 書 館  
上海及各埠

中四八四九

徐

(本書校對者華國章)

# 玉暉堂詩集卷二

## 五言律

### 秋浦曉發

殘月生秋浦。江村戶尙扃。曙光搖塔白。松露滴山青。世態看長劍。天涯逐汎萍。蕩舟出蘆港。東嶺下疏星。

### 泊襄洋借宿僧舍

晚泊三江外。江流萬里長。暫辭漁父櫂。來問贊公房。石岸懸珠閣。藤牆隱畫廊。夢回殘月下。安穩似吾鄉。

### 青口出江

出口穿荒荻。江流隔淺沙。洲晴喧浴鷺。風急蹴飛鴉。白髮宜茅宇。青篲負釣車。停帆暮回首。西北指京華。

### 曉起

殘燈猶挂壁。窗隙見晨光。短髮梳難把。寒衣綵未裝。天涯憂戰伐。歲晚怯冰霜。昨日邗江路。逢人問故鄉。

### 客六合同張九遠登西城二首

幽林來暮色。聯步出松關。偶上城邊閣。閒看雨後山。雲歸峯隱見。潮落水潺湲。之子不相聚。難同慰客顏。

曾識阡前路。沿流到石林。叢篁迷舊迹。衰草隔幽尋。寺晚鐘初定。江寒雨後深。僧堂聯旅榻。盡日伴高吟。

雨晴同九達出郭晚望

城邊收積雨。晴色暮天遙。水郭喧漁市。江船集野橋。斷雲明落日。遠岸響歸潮。遣興思醺醪。青帘樓外招。

黃石筍招九達劉六千靈巖山宴集二首

東峯林壑斷。飛練落江波。楚樹連雲盡。吳山隔岸多。平田分細水。高岫挂垂蘿。拄杖深松裏。歸禽集暮柯。半山紅葉寺。下聽暮鐘遲。側足驚苔滑。閒心引杖移。分題詩並和。選勝酒行隨。坐見楓林晚。催還白玉卮。

界首阻風四首

逆風舟不進。晴色競淒清。海日迎霜白。湖波隔岸鳴。行人喧小市。羈客數歸程。已判升沈理。淹留信此生。野泊朝炊晚。齋鹽逐舍求。但能安簡薄。到處得夷猶。亂世貧非拙。通材食不謀。卽教今不去。坐臥有扁舟。停風亦何事。移杖入林間。逐肆懸乾腐。沿街賣凍魚。漕隄平屋脊。湖漲及階除。莫更煩牽挽。殘民饑饉餘。倚櫂起長望。時艱失路多。流亡行自鬻。估客倦相歌。舊稿書仍改。殘毫凍復呵。笑招舟子語。不去耐愁何。

舟夜發

日短舟宵進。荒隄片月寒。長風號亂水。仄岸響迴瀾。水宿開船少。冬殘作客難。故園小兒女。日夜望歸鞍。

黃家嘴二首

口塞村初闢。黃昏過客迷。地形隨岸轉。茅舍逐簷低。几榻連槽檻。庖廚瀾豕雞。夜深投宿滿。片席慰栖栖。當日河初決。塵蹤記屢過。暮投舟子宿。夜聽婦人歌。土著原無幾。塵成未漸多。蘆牆與蓬戶。終日畏風波。

次下相聞王暉如旋里

楚塞兵初解。歸舟下漢川。一官淹歲月。萬里阻烽煙。歧路愁長睡。佳音喜不眠。田園堪慰老。百口羨生旋。宿遷早發

覃懷道中

貪路侵晨發。鬚眉結曉霜。寒空凝海霧。初日動湖光。舟纓還依岸。村煙稍出牆。人傳沽酒肆。三里過前岡。清華新雨後。夾岸稻畦分。野竹連青嶼。山泉下白雲。鳥聲經樹落。樵唱隔林聞。前路覃懷近。塵裝憩夕曛。

孟津渡河

山光雨後真。朝日散河濱。倚櫂東懷土。驅車西入秦。青衫牧豕客。白髮飯牛人。買渡頻來往。臨流暗愴神。鐵門阻雨

雨餘漫興

夜雨山村客。瀟瀟聽到明。涼侵窗裏夢。愁落枕邊聲。失路安垂老。違時強遠征。泥塗何日起。淹泊不勝情。滂沱連日夜。積潦泊前除。遠樹鳩空怨。當軒徑半淤。就乾頻改榻。避漏屢移書。獨有西山色。青青伴索居。立秋前一日曉雨

晨窗響疎雨。浙瀝迴秋聲。秦地涼生早。鄉心夢已驚。桐陰銜墜葉。雲氣暗孤城。徑草愁來夕。啾啾絡緯鳴。春正見新月二首

新月清宵白。春風小閣深。鄉愁誰共語。客苑自行吟。戍鼓初傳夜。山燈半出林。倦來依宿火。寂寞子雲心。閉關便孤坐。空窗燭影深。浮生徒自笑。薄俗付長吟。白衿栖春署。青山憶故林。幾時駕黃犢。一遂買山心。

河上公授經處

春風花落片。古路踏殘紅。空惜塵中客。難逢河上公。傳經千載異。求道寸心同。去去重回首。雲山向洛東。

函谷關

函谷關門啓。荒岡路尙昏。磬鳴山頂寺。雞唱水邊村。雲濯春花淨。雨滋宿草繁。衰年畏塵鞅。登頓憶林園。

慈中

殘月如新月。瑩瑩曉樹閒。終年滯塵土。何日罷關山。驛柳搖煙碧。崖花點石斑。幸於驢背上。賒得片時間。

劉敬之嘉賓兄弟過草堂二首

接邑村非遠。尋常負杖游。偶因秋漲闊。得遂草堂留。相憶惟看月。孤吟獨倚樓。忽傳雙白髮。並蹇到林邱。殘暑秋還熱。移牀坐樹深。短簑呼野老。啜茗伴長吟。濁世安貧意。衰年求道心。眼中賢伯仲。壁立幾千尋。

客天雄宿黃遜庵齋張楓臣夜過卽訂詰朝之約

北舍塵裝解。高齋局寂寥。相招猶隔日。對酒且寒宵。竹月迎簾入。松風拂檻遙。別離懷不淺。餘興續來朝。

次晨赴楓臣招李聖思後至張右君赴列人未返

寒篠依窗暗。雙桐夾徑分。朋遊過便醉。昆季日爲羣。漚酒來供奉。籠鵝少右軍。楚江遊旦暮。揮手隔重雲。

單父贈周子遜

旅舍聯高榻。寒宵會面初。月翻松影亂。風引竹聲疏。雅興猶耽畫。衰年倦著書。不緣江海上。那得遇相如。

雨後朱武林招同周子遜集浣古齋

櫛沐晨初起。高軒折簡催。渾忘公子貴。許汎野人杯。疎竹沾寒雨。長松護紫苔。相攜聯短杖。爲踏水雲來。

陳耐庵招飲

寒夜驅車至。西園放臘梅。笑言新酒熟。恰遇故人來。老友千秋契。窮途一飯哀。九州誰相馬。空失軼羣材。

襄陽遇張六翮二首

廿載洛關別。天涯絕素魚。三經過滏口。未得話離居。留贈詩常把。窮愁老倍初。何期逢漢上。對酒益欸歔。乍說還疑夢。相看淚已漣。一官疲閱歷。萬死脫烽煙。淹滯原吾道。飛騰憶往年。脊鴿天外影。好買錦江船。

楊少參筠湄夜署讌集詩四首 有引

雪融梅署。月滿松廊。燒畫燭以張筵。促錦鞍而延士。紅牙度曲。梁飛玳瑁之塵。紫露流香。杯泛葡萄之醞。揮塵而座霏玉屑。刻燭則句擲金聲。主人高投轄之風。賓傾北海。詞客陪踞牀之宴。興比南樓。共咏佳篇。獨慙首唱。

好月生新霽。華樽卜夜歡。衰年裘不煖。殘臘雪增寒。一徑穿珠樹。雙燈引玉鞍。上方鐘磬歇。哀角起更闌。候吏留金鑰。傳呼報客來。雪融冰砌滑。燭閃夜園開。欲續尋梅賦。先傾坐月杯。習池泥沒屐。隔日約追陪。



爐煙飄綺席。燭影動流蘇。密座俱佳士。狂吟媿老夫。坦懷傾一世。大雅未云孤。累日壺常接。鄉思片刻無。談深還秉燭。飲劇閒清歌。興豈緣愁減。身無奈老何。乾坤消戰氣。宸極賚恩波。歸臥衡漳上。雲中聽玉珂。

沁洲

署有古松

郵署淹長夏。空廊晝掩門。雲閒聊獨望。松古向誰論。去住隨行侶。栖遲黯旅魂。何如沁漳水。東下繞林園。宿交口

四圍山翠合。驛舍解塵裝。細徑下歸牧。遙峰隱夕陽。土風僻近古。嵐氣暮生涼。只似鄉園裏。匡牀臥草堂。昂車關

空巖四五月。曉色回秋時。市小門開晚。山高日上遲。荒蹊隨澗勢。古穴受雲欺。千里太行道。盤駝北漸夷。并州午日

午日并州客。空階坐曉涼。輕風翻樹影。初日淡雲光。遠興開書帙。扶衰檢藥囊。故園當令節。繫縷盼歸裝。樂平道中

樂平南去道。撲面亂山迎。斷壑風雲悍。空巖草樹矜。爲尋鄉路近。渾忘客生輕。對嶺閒驅虎。錚錚矢石鳴。七夕後一日雨霽晚徑移牀

移榻煙蘿外。柴門夜不關。秋空月露重。夕徑野雲閒。小簾涼新雨。孤樽慰老顏。雙星渡何處。銀漢寂潺湲。壽陽旅舍雨後坐月

雨過秋雲斂。涼宵片月清。窮途行向老。多病耐孤征。隔院笙歌促。當階絡緯鳴。淒淒難伏枕。續燭坐深更。  
楊學使自雲中東余月終回署

昨枉雲中札。旌旗至雁門。可堪久離索。未卽晤朝昏。獵騎秋原兔。霜燈夜暑樽。新詩應滿帙。相望好深論。  
繆乘六江非諾蔡曉萃劉敬枉答寄懷

蒲節分攜後。相思秋漸深。每從雲樹望。難寄別離心。邊地霜前雁。詞人塞上吟。翻憐句注頂。未得附登臨。  
懷張西山孝廉

漢江殘雪裏。對策向蓬萊。便道邯山過。憑君鄉信迴。桑乾魏尚蹟。紫塞李陵臺。年少心多感。登高賦擬裁。  
曝背

曝背晴簷下。空闌落葉深。天高鳴塞雁。霜早亂秋砧。翰藻文園病。煙波漁父心。幾時雲水外。散髮臥長林。  
曉起

夜雨淨秋塵。階苔展翠茵。晴窗開霽日。爽閣淡幽人。好事隨浮世。吾衰謝問津。敢言尋遁迹。巢許亦王臣。  
奉和御制送內閣杜公原韻

寅恭無闕職。歸老臥昇平。睿藻翻三疊。天筵布兩楹。元臣高尙義。聖主泰交情。賀監湖山興。千秋風並清。  
申臯盟路徵吾李聖友游西山回寄訊二首

聯杖尋丹壑。空巖落葉深。偶因憂世想。得遂住山心。霜澗穿紅樹。雲窗仰翠岑。不知絕頂上。對酒幾回吟。

聞道懸壺腦。嶽奇不易登。千峯攢戶立。曲檻入雲憑。斷磴通垂索。崩崖護老藤。冥鴻天地外。誰復意羅罍。

題申觀仲新齋二首

新築占幽勝。城中見野煙。到門梧竹引。接檻薜蘿牽。君愛居離俗。人疑地近仙。十年費經畫。心上有山川。

曉窗步友人韻

曉窗淡寒日。藜藿信長貧。不作衰榮想。悠然江海人。綠樽溫老面。白髮伴閒身。世上誰知己。相逢漫問津。

春晚過曲安訪彭扶九內弟途中遇雨二首

驅車渡漳滏。帶雨訪情親。啼鳥下村樹。落花霑路塵。烽煙萬里別。老病十年身。今夕春窗酒。相看倍愴神。

老至宜常會。時艱況異居。每逢親友使。得致往來書。多病擎杯懶。長貧見客疎。不知離別後。衰鬢復何如。

李方曼招飲易園二首

故人諳客況。累日命傾樽。獨此溪邊閣。蕭然江上村。雙潭分亥徑。曲岸引衡門。我愛鏡湖叟。詩成得並論。

地幽全卻暑。徑外晚涼侵。窗綠欄移竹。簾青雨過林。江山新戰壘。蔬酒舊知音。且復醉良夜。推遷自古今。

夜坐

林中織月上。暮景散層城。遠樹蟬初歇。空階暑漸清。塵沙憐薄俗。衰白謝浮名。欲逐乘槎客。江湖未解兵。

夏日贈盧菽甫明府

槐涼消暑寂。政暇但鳴琴。獨有山中鶴。來聽空外音。松華翻露滴。蒲影映簾深。瀟洒陶彭澤。漉巾引客吟。  
雨晴

雨晴餘溽暑。桐影轉斜曛。蝸引緣牆徧。苔痕入徑分。閒愁消散帙。老眼眩看雲。冉冉西風至。清秋溷鹿羣。  
暑雨過蓮亭卽景應沈郡伯命二首

避暑熊幡引。來尋水上亭。槐涼搖徑綠。荷氣撲簾青。賓從歡前席。鳧鷗浴遠汀。塵纓聊此濯。五馬散郊坰。  
江湖戈未息。輪輓歲仍連。游釜終當盡。歌襦此獨偏。閒無虛勝迹。興足寄幽泉。霽色生遙浦。櫂聲歸采蓮。  
七夕前一日

疎桐露漸白。涼月下庭隅。斜漢流無際。雙星影尙孤。荷戈沈玉塞。伏櫪困泥塗。多少征人婦。清礎怨夜徂。  
秋曉 時寓鴉城千佛寺

秋空初日上。殘月一痕青。白露明珠樹。微風響梵鈴。觀身暫獨拙。入世豈容醒。不問升沈理。生涯信泛萍。  
聞礎做古秋閨體

秋礎夜未歇。思婦意何如。不見雲中雁。空懷塞上書。玉關霜落早。金井葉飛疎。強欲親刀尺。蘭闥淚溼裾。  
濟軒上人相招

昨傳開士約。北郭問禪扉。木脫遠村出。天高社燕歸。當年負微尚。此日欲皈依。茅屋妙香引。塵中暫息機。  
清明前一日約方昱東訂東郭之遊

灑川寒食近。客舍約相過。難遇花時好。無愁酒債多。步聯青竹杖。醉入白雲窩。不識來朝咏。能如晉永和。

客高唐憶公車諸友人旋里

別來春已暮。歸道草煙深。我尙淹歧路。君應返故林。園花開倦眼。家醞破愁心。多難看時態。無勞望好音。

清明日攜文仲姪出郭因至李氏園小飲二首

鳴犢逢寒食。晴郊散旅愁。亂花翻錦樹。高柳隱紅樓。半醉開塵眼。狂吟任白頭。名園通近郭。攜手並探幽。金谷花村裏。芳塘抱曲欄。幽禽不選樹。新笋半抽竿。臺榭春雲入。壺觴客興寬。野人珍重意。暮色戀餘歡。

劉雲麓刺史招同劉公定明府于待公將軍成小西宴集李氏園亭二首

名園曾一過。花徑板橋通。聯騎穿晴樹。垂鞭拂野風。百年耽濁酒。雙鬢老飄蓬。客至衡門啓。山童掃落紅。近竹亭能敞。高臺屐可通。雲邊芳草徑。池畔落花風。多難聯佳會。浮生逐汎蓬。接羅從自側。遙嶺夕陽紅。

張御錫招同于待公劉雲麓方克恕文仲姪賞牡丹遇雨

屢接看花約。三春興未孤。牡丹經雨放。綠蟻傍亭呼。白髮隨飛蓋。華筵瀾腐儒。遂教歧路客。終日一愁無。

移寓僧舍夜雨口占

官署愁喧雜。來尋僻寺居。下簾聽暮雨。燒燭檢殘書。浮世憐芻狗。塵踪淡木魚。夜深鐘磬寂。清夢迴吾廬。

高唐大覺寺

初地開何代。殘僧只一家。古碑餘斷篆。廢塔噪昏鴉。仄徑蒼池涸。危闌白石斜。珠宮經歲掩。塵滿鐵袈裟。

自東郡返夜至意舫草堂

冬殘日易暝。夕鳥暮飛稀。林暗村燈出。月明人夜歸。敵裘寒欲透。衰鬢老何依。比到衡門下。深更應掩扉。

社集石佛庵

悲心厭秋氣。黯澹臨西風。溪轉得精舍。林端逢遠公。孤懷禪易入。野酌興全同。清話不能去。夕陽挂暮桐。

王灌亭月下見訪

闌花溼玉露。星影淡秋河。不有美人至。將如良夜何。芳樽散羈思。孤興引清歌。好月若相勸。婆娑上薜蘿。

秦仲玉齋中逢苑闕蒼步闕蒼韻

相思閒秋夏。相遇值銜杯。疎雨燈初翦。寒屏菊尙開。好懷多病減。深坐爲君來。聚首且同醉。湖山未草萊。

郊居二首

窮達既有數。吾亦尋吾真。交結謝時輩。行藏問古人。春來何所適。老至不辭貧。卽此悟高隱。禽魚或可親。

過趙香雪草堂

孤茅白雲際。野徑引晴沙。之子澹無事。空林倚斷霞。千秋分令望。百里此天涯。不必問窮達。吾生有釣鱉。

社集香雪齋中

芳宴集羣秀。疎陰散遠林。風流吾黨在。江海爾何沈。返照明虛閣。春沙落暮禽。醉中從簡略。雲鶴久無心。

李鶴園招飲繡佛齋

悠然高士心。力疾愜幽尋。纖月生遙浦。疎桐散夕陰。窮愁侵劍冷。風雅訂交深。既醉不能去。留連山水音。

送王廣生赴甘陵令幕

東郊新雨後。夏木鶻餘清。送子來溪上。淒然離思生。窮途攜病往。華髮傍人行。負米懷前哲。予其悉此情。

發鵝城

曙窗呼僕子。結束拂塵衣。倚壁春燈小。欹林殘月微。長貧催客路。多病戀魚磯。遠懷古人意。披裘自息機。

寄汪儀甫伯仲

陶山落木外。悵望隔霜煙。每語天下士。聞君兄弟賢。擁書寒坐月。愛友夜呼船。何日同罇酒。頽然徑竹前。

送樸姪依父讀書陶山

家貧輕骨肉。十六去園林。幸有趨庭別。聊安遲暮心。寒宵清淚接。長道曉霜深。莫更矜年少。征衫薄自任。

字

相逢俱素好。白髮謬交歡。下有吾徒醉。誰憐歲暮寒。霜高圍燭小。月小入簾看。惆悵嚴城夜。分攜興未闌。

成伍嵐翰林過訪

太史湖山興。青年薄一官。不辭冰雪出。來問野人寒。賣賦貧能懶。謀生老未安。畫闌梅影綠。許共倚罇看。

之大梁留別天雄故人

白髮憐生事。淒然向酒卮。可憐爲客日。復作贈離詩。坐月吟梁苑。因風憶大伾。流連看夜色。清漏隔雲遲。

澶淵道中次鶴園韻

十載常歧路。支離彊此身。江山愁伴客。詞賦老依人。春草憐裘敝。霜華入鬢新。笑談之子在。端可謝風塵。

宿衛河寄懷朱汗朱

春星低遠樹。燈影倚窗清。記別朱公子。遙憐芳草生。隔鄰聞夜語。近枕落溪聲。咫尺梅花徑。無由話此情。

聞鶴唳二首

深宵坐不寐。燭影淡相看。何處唳孤鶴。蕭蕭渡曲闌。哀音真有訴。欲問卻無端。或亦鍛雙羽。徘徊渡夜寒。

月明矜玉立。野性未全平。不向山中老。應甘世上情。自知非俗尙。誰與說孤清。待到籠開日。松巖時一鳴。

寄錢太常玉章先生

功成期入道。林壑暫徜徉。每語大君子。俱推錢太常。朱絃揮素月。白紵引流觴。何日扶藤杖。題詩上玉堂。

寒食舟過無錫

錫山寒食路。晴曉望江天。游女閒如畫。孤槎杳若仙。遠花紅笑日。近水綠浮烟。不向此中過。悠悠八九年。

儻宅

儻宅臨春水。窗中聞棹歌。虎邱新雨足。鶴市夜寒多。不寐依銀燭。含情憶釣簑。何年謝塵事。浩蕩臥巖阿。



樓上

樓上春寒劇。溪邊暮雨收。簫聲花榭酒。燈影市橋舟。客興惟高枕。人情閱敝裘。范公千載後。誰復五湖遊。

登玉峰山絕頂

少壯看山興。江湖老不違。釋舟穿暮雨。孤杖伴塵衣。倚樹聽幽籟。分雲坐翠微。晚林懸霽景。明月照人歸。

贈馬殿聞二首

憶晤慈仁寺。秋燈對夜闌。懷人增白髮。別夢繞青山。帆雨三江闊。松雲一徑閒。此逢真不易。細酌慰離顏。夏閣新移石。春欄舊種花。竹涼搖晚徑。簾影映晴沙。曲室藏書滿。澄溪帶檻斜。馬卿看奏賦。侍草近清華。

薄暮移舟再登玉峰山

不倦登臨意。扁舟晚復行。板橋曾受屐。沙樹昨聞鶯。水宿仍依郭。山遊翻入城。暮煙迷鹿苑。懷古一含情。

雨

夜雨涼生幔。瀟瀟枕上聞。清晨猶著屐。亭午未開雲。影澗江湖白。聲雷雁鷺羣。空簷獨來往。溜響正紛紛。

行次南屯便訪張素元羽士

南國行初發。途經羽客廬。入門花影接。高柳鳥音疎。鄰嫗供期爨。山童摘野蔬。塵中復長夏。小臥夢徐徐。

臨淮道中遇雨

長道霏江雨。逢人問驛亭。近塘新稻綠。隔樹暮山青。草店簷低接。柴門夜不扃。傳餐呼客起。倦臥目難醒。

宿江心驛

向夕風初定。張燈雨又來。只愁前路滑。安得曉雲開。垂囊真難滯。繁憂不可裁。破除惟濁酒。且復掌中杯。

江心驛曉發

晨興看雨歇。驛路淨無塵。世棄知途馬。天哀失路人。山橋含霧滑。岸草沐雲新。只慮牽兒女。浮踪勉自珍。

帶山鋪

斷壑藏村塢。迴溪渡蓼灣。草堂圍綠樹。石徑帶蒼山。農圃心無累。雞豚意亦閒。只如漁父權。偶到武陵間。

涇縣道中雜咏十首

迴合緣山勢。潺湲落澗聲。路疑行處盡。谷轉去還平。低嶺長松覆。深林雜鳥鳴。引人初入勝。真豁旅人情。叢樹溪邊合。巖扉晝亦關。不須高隱遇。已識此中間。籬下翻香稻。牆頭擁翠山。肯容作鄰友。百歲不知還。四壁露風雨。朝炊拾澗毛。問知經代謝。曾未出林泉。麻絡鳴晨杵。糯釀饜夜槽。雞豚與兒女。一室意陶陶。松棚委巷接。比舍列黃鱸。就竹編籬落。疏泉到野廚。溪兒喧淺瀨。浣女晒平蕪。不識龍眠老。還能畫出無。夾道蒼松合。穿波錦石圓。茶庵五里界。茅店數家連。牧子閒如鶴。居人散若仙。武陵全在目。不用釣魚船。一川日十渡。盤曲閒山蹊。雲氣沈松嶺。泉聲入稻畦。採茶籃影並。舂米杵音齊。薄暮獨長望。人家落照西。山橋懸百丈。湍迅石崩欹。接木通人過。攀藤出峽遲。病餘愁涉險。老至怯登危。賴有煙霞色。聊舒倦客眉。曬麥瞻晴日。筠筐趁晚檐。樵童歌細細。績婦手纖纖。小艇懸魚網。孤村漾酒帘。欲題佳景處。韻險幾回拈。

嶺樹攢杉直。河房架木牢。村墟水碓徧。市井火牆高。畫字通方語。傳家只敝袍。山溪半清淺。短櫂撥漁舸。記程涇欲盡。勝迹伴猶夷。曲沼飄香杜。空山響畫眉。僧閒留啜茗。客興耐題詩。大令逢前路。還應掃墨池。

留別龔芝麓先生

高齋春雪夜。煮酒薦江鱗。接座俱朝貴。譚詩向野人。老攜貧作友。身遠道相鄰。解組尋黃綺。漳南問釣綸。

留別韓聖秋司馬

長安淹隔歲。得醉卽齋頭。宦已空塵迹。心其與道遊。酒痕餘野服。詩卷挂漁舟。念子陳高座。相看慰別愁。

寄陳宗來山人

宗來名來。自號龍釣漁郎。白門人。善畫工隸書。與予訂交於金華。入豚梅。宗來曾依覺浪師於虎跑。

雙溪臨別語。誤子薊門過。錯計丹青貴。翻令酒債多。西冷新梵舍。白下舊巖阿。莫更遲歸計。閒門長薜蘿。

申觀仲齋中清譚薄暮緣城歸東溪草堂明日卻寄

登臨避城市。獨往與徜徉。一杖扶春色。行吟歸草堂。亂峰翻日氣。晚霞引泉香。愧未攜之子。溪頭盡一觴。

寄懷陳允倩兼致申伯子冕盟

春帆初把臂。春帆。芝麓公齋名也。予與允倩定交於此。道氣百年存。曾約逢申子。相招入薊門。萍蹤同汗漫。蕉影亂朝昏。歸棹由

漳上。無忘處土邨。

人日

人日并州客。蕭然此閉關。長風連紫塞。殘雪阻邯山。鄉遠書難達。愁多夢易還。不堪開曉鏡。惆悵見凋顏。  
穀日薇齋宴集

令節落華宴。春軒月影清。興來思劍舞。老去愧詩名。絳燭迴殘夜。朱梅冷畫檯。窮途誰得此。爛熳古人情。  
雪晴步襲伯通韻二首

迷方淹客路。生事等虛舟。窗曙明殘雪。朝寒問敝裘。向人羞鬢髮。漸老憶林邱。夢裏漳干月。漁舸冷荻洲。  
曙雪晴還落。憑軒野興饒。苑松聲蔌蔌。徑竹影瀟瀟。白髮湘魂冷。黃塵塞月高。孤情惟賈傅。投賦一相招。  
寄懷錢青長孝廉

海雲相別久。燕市再逢時。終日貪春醉。都忘贈答詩。注囊惟梵典。高話半軒岐。卽此心俱遠。能無繫我思。  
寄玉譜宗弟

千秋通譜系。傲岸復吾徒。雪裏詩相和。燈前酒並沽。分氈溫凍足。折簡護窮途。漫道平原後。寰中好客無。

贈山子宗弟  
山子名溟。舉辛卯孝廉。吳江人。子祖曾。宰其地。爲予述先司馬遺書賓館中。至今榮然。山子守功過格甚謹。

同宗兼老舊。傾蓋罄行藏。愛客傳先吏。遺書誌草堂。未僧嚴戒律。取友半滄浪。檢點新投契。交期君最良。  
寄劉欽中恤部

客堂門巷接。旦暮得相過。閒借碁消日。歡容酒代歌。沙塵予汗漫。軒冕子蹉跎。林慮春山好。歸懷近若何。  
贈邢襄守郭石公

衝郡能留客。高風迴絕塵。席門如處士。草閣引漁人。花散千村雨。蒲懸九陌春。怪來華鬢早。勤苦爲斯民。

寓邢州西寺雨中懷申冕盟

薊門憐握手。客裏興俱閒。入市春沽酒。騎驢醉看山。暫歸仍野寺。念別挂禪關。雲外蕭蕭影。思君正損顏。

寓邢襄西寺夜雨漫成

招提夜初靜。龕外一燈沈。細雨過春堞。微風響石林。妙香清到枕。溼磬落寒音。不謂羈塵迹。翻能寄遠心。

曉雨寄建平守郭石公

朝雲低未去。倚杖此林端。剝古苔痕紫。松高雨色寒。幽懷逢寺住。老態逐人難。近識邢襄守。投交見古歡。

寄贈李都五同社

廿年證白雪。今日問青蓮。作令憐雞肋。歸耕老石田。都五早歲謝巴陵令歸里賦詩五柳下。載酒百泉邊。不識幽林外。能

維棹雪船。

寺寓偶興

雨晴花界寂。客裏罷招尋。松下看碑坐。風前倚樹吟。檐鈴流梵籟。山鳥送春音。不到幽林住。誰知物外心。

寄華章左友人

遙傳遊幕下。官舍閒徽音。澤潞三年別。招提午夜心。新詩應滿帙。老髮已盈簪。近住城西寺。君能踏月尋。

雪中同申冕盟過訪田髯淵

髯淵名茂遇華亭人才雄學博倒屣公卿評選古今詩文爲世推重

長安三尺雪。終日掩柴關。履迹門前少。書聲雲外閒。才推西鄴上。人在永和間。撥火談方暢。山童貰酒還。

懷張命士老友三首 有引

老友名蓋。字命士。號箬庵。予同里人。少豪宕傲岸。博學彈琴。賦詩落落。不與俗士伍。甲申後。棄儒冠。不入州府。講學於漳滏之濱。生徒甚衆。甲午忽發狂疾。築土室自閉。妻子友朋罕見其面。偶爲歌詩成。或自焚其稿。或沈之井中。己亥夏。走乃郎子愚。招予散髮據門。呼借草笠。見予於土室。月下話舊。老淚橫襟。道言讖語相間而出。予亦不識其果病否也。數年間。絕汗漫江湖。悵然興懷。爰成三律。後世之採風者。逸民傳中。或取子言以爲質。

十年封土室。久與世緣疎。流落憐吾輩。徉狂得自如。著書沈谷井。拚老葬江魚。近欲遊嵩華。遙聞市白驢。妻孥不復見。一徑草全平。穿竇通藜藿。彈琴樂性情。鬢鬚憐盡白。歌哭但聞聲。偶亦垂家誠。惟言織與耕。前年忽相憶。散髮候莓苔。索笠還予拜。移牀待月來。問時空一嘯。話舊動餘哀。夜久林端黑。呼兒送客迴。

懷殷宗山老二首

西甯方稅駕。雙槩復華亭。宗山從劉建平中丞於西壽二載。旋里。未三月。又隨乃壻張友吉別駕遊吳松。鬢帶風塵雪。囊餘山海經。酒招京口月。水買惠

山瓶。出處隨幽興。奇懷詩自靈。

汎然何所適。踪迹似無家。空負柴桑菊。虛尋碧海槎。老妻寒絡絮。巢壑暮封霞。宗山早歲謝旌壽令歸。徧遊五嶽。常豫中原山水。蕭索思泛海遊高

麗一放奇情。吁亦豪。  
矣。集。盤。宗。山。圖。名。  
何日長遊倦。山樽對日斜。

邯鄲友人張雪品飲錢於一無上人房

詎意邯鄲道。春風接盛筵。座容盤蹙客。杯汎雨花天。老畏交遊薄。貧憐義氣偏。依依惜分手。落日暮山懸。  
宜溝早發

宜溝侵曉發。殘月出林低。雨浥沙源淨。風吹驛柳齊。蘇門翻遠岫。淇水咽春溪。不遇孫登嘯。浮生到處迷。  
拜殷太師比干墓

畢諫一身盡。孤忠萬古傳。赤心懸烈日。青史照重泉。芳塚題先聖。墓前有孔子刻石。靈宮拜大賢。欲歌麥秀什。企仰

倍悽然。

清華鎮

薄暮山村外。蕭森竹萬竿。濃陰連野綠。高節拂雲寒。爲楊清晨夢。編籬護藥闌。晚來微雨過。細響迺江干。  
桓陵道中

積雨桓陵道。青泥沒馬蹄。水春荒磴仄。雲壓亂峯低。危坂誰相挽。衰年望易迷。昨宵今陌上。去住總栖栖。

閿鄉舊城

閿鄉縣屬  
陝州潼關

山縣移何代。荒岡尙此城。戍樓餘瓦礫。市肆半榛荆。破屋人多竄。乾壕農自耕。幾家依近郭。炊黍待人行。

晏坐寄李素居

晏坐深檐下。清機來靜中。晴槐明宿露。朝槿動微風。客遠逢迎少。交深出處同。他鄉蒲節近。攜酒暮山東。  
午日二首

庭檜上朝暾。開簾坐曉軒。剪蒲呼侶伴。繫纜憶兒孫。宵露明高樹。山煙出遠村。他鄉兼令節。寂寞付深樽。  
節候衣宜葛。雍州曉尙絳。地高全卻暑。署靜迴悽禪。老目書難把。繁愁酒易捐。山禽如有意。啼過客窗前。  
溫泉

仙瀨驪山下。靈池閱古今。名泉開寶地。勝迹快幽尋。暖氣通陽谷。香瀾映綠岑。長安車馬客。聊此浣塵襟。  
立秋前一日曉雨

春別漳南樹。回頭見故鄉。邠城臥暑雨。漳水向秋霜。白髮憐時序。蒼梧憶草堂。瀟瀟檐際色。一倍黯迴腸。  
古意

纖雲向夕斂。涼月靜輝輝。斜漢影全沒。疏星光乍微。關山同淚眼。砧杵憶征衣。惆悵交河道。秋來歸不歸。  
中元夜對月

夕徑落花陰。空階露氣侵。暗蟲生細草。明月引清砧。夢識還鄉路。秋知作客心。故邱惆悵處。遙涕一沾襟。  
見秃尾雀引雜作

劬勞將衆子。鳴躍下花陰。就哺沿蘿徑。教飛穿竹林。翛翛毛羽黯。脈脈怙恩深。好學慈烏義。晨昏慰母心。



午日同王炤千楊清遠沈禹玉吳平子馬季白趙山子彭扶九宴集王方伯湛求先生署中四首

午日槐堂下。朋從媿釣夫。闌香飄芍藥。盃綠汎菖蒲。詞客西京舊。高風北海徒。暮階移錦席。長嘯戀江湖。  
雨散涼颺進。牆低好月來。清談宜近夜。高咏間行盃。矢落壺聲下。花翻燭影迴。更深聞款曲。累日許追陪。  
碧草圍拳石。朱華秀膽瓶。雲光團月白。嵐氣抱城青。醒酒傳吳芥。分甘過楚萍。蕉窗搖彩筆。勝事卽蘭亭。  
劇飲觥籌亂。良宵歌吹清。竹枝鶯在舌。緱嶺玉爲笙。岳峙三台近。川流萬壑平。彈冠看往哲。窮達見交情。

過訪王炤千於宗善寺二首

合簪方岳第。高話接潛夫。華宴聆芳藻。雀辰對汎蒲。江山同作客。傲岸卽吾徒。澹靜看如此。懸知老鏡湖。  
聞住城邊寺。門期野客來。高松遲共賦。明月約銜盃。曲檻曇雲合。空檐石磬迴。生平求友意。杖履數追陪。

寄傅青主隱君

高致聞吾友。山中自結廬。看雲移短杖。醉月抱奇書。白髮閒相得。黃冠老自如。塵纓慚未浣。肯許近階除。

薇署仝朱香侯小酌

星月巖城夜。空檐酒並斟。得閒俱勝跡。縱飲是知音。詞賦誰相市。塵沙老易侵。醉中看共惜。白髮半盈簪。

寄示楫兒棣樸兩姪

終歲風塵裏。離憂黯自憐。但能勤誦讀。差以慰縈懸。老至逢迎拙。愁來困頓眠。柯亭時悵望。香影散池蓮。

立秋日送彭扶九內弟歸曲安

吾弟諳爲客。方秋決計歸。鳴蟲難伏枕。哀鴈易霑衣。山雨雲邊徑。村燈竹外扉。遙憐老幕士。留滯與何違。

送別張孝若

患難常爲客。悠悠十四年。所惟孝友性。真動故人憐。天柱飄梧葉。襄川漲百泉。早歸慰慈母。白髮正懸懸。

晉署春懷九首

疏簾映朝旭。殘雪帶春陰。兀坐清閒署。常懷山水心。禽魚遺宿好。燕雀感知音。藤杖青篔簹。何年向紫岑。可惜身垂老。空慚道未謀。年光春又換。花鳥願何酬。有日供橫笛。無人伴倚樓。雙漳冰已泮。冷落釣魚舟。老鶴山攏貌。懸鶉野衲身。三年千里客。兩代六朝人。奇數非違祿。多憂不爲貧。徜徉山水外。古有白衣臣。亦知筋力憊。野色引幽情。欲買雙柑子。閒聽一樹鶯。淺莎隨地坐。短杖繞溪行。且自尋春事。何求身後名。閒說羣峰裏。空林春外閒。百錢謀拄杖。雙眼辦看山。人世凋塵鬢。僧廬散旅顏。杏花新雨後。發興一登攀。衰年多閱歷。富貴總浮雲。笑對三春景。閒搜大塊文。人情徒碌碌。世事信紛紛。獸有東臯子。詩成日醉醺。息靜門常掩。春風小閣深。莫將今日事。遠望古人心。老去無羈束。閒來有醉吟。郊原新柳色。雙屐入春岑。并州遲節候。二月似冬殘。霽雪侵裘薄。輕風撲面寒。山鶯鳴尙澁。寒鴈渡猶難。不比漳干舍。花開壓小闌。晚計郊扉在。春風苦憶家。闌蕉應捲葉。徑草擬抽芽。夢裏鄉園近。雲中客路賒。歸期訂未遠。猶見杏林花。謀歸心日切。行止漫難期。卽返故山去。其如造物移。吾生原浩蕩。誰許老茅茨。肯負看花眼。迷方信所之。



# 玉暉堂詩集卷四

## 七言律

### 安慶旅舍書懷

龍眠客舍南湖曲。坐見湖光映海關。工部能詩同白髮。宣城築室閒青山。蘆洲中斷雙江迅。榆塞羣分一鴈還。遠魄煙波老漁父。日斜曬網向人閒。

### 采石磯登太白樓

謫仙一去向千載。采石猶存太白樓。高咏磯頭留勝迹。緜衣江上想風流。芙蓉水落黃牛渚。鴻鴈天高白露秋。最是金雞歸放後。雄才蕭索老滄洲。

### 雨中泊舟采石

向夕輕風送遠雷。蕭蕭江電掣林開。漁燈遙傍孤舟落。蟹火低隨曲岸迴。獨臥繁愁凝客枕。中宵風雨下仙臺。已知塞鴈南飛近。溢水音書望不來。

### 瓜舟旅寓夜雨二首

廣陵木落海門秋。瓜步江深水暮流。天畔孤槎隨白髮。雲邊遠夢繞滄洲。窮途阮籍猶耽醉。賣賦相如未

解愁到處清。砧催翦尺。綈袍誰復憶同遊。  
颯颯西風興寂寥。疏燈自照影蕭蕭。天高塞鴈衝寒雨。夜半江船趁早潮。老滯關山逢世難。愁推枕簟坐  
秋宵。故園兄弟看明月。碧酒朱闌望正遙。

贈京口劉冠侯副戎

劍華光射海波清。蒲毅新推上將營。蓮幕欲攀高唱入。轅門肯爲故人迎。旌旗獵獵巡江戍。笳鼓噦噦練  
水兵。尙有滇南未歸化。廷懸金印待專征。

潤州江樓漫興

京口高樓瞰潤城。樓前日照海潮明。風豚拜浪翻蛟窟。秋隼辭鞬脫騎營。大將不延長揖客。上公誰識碎  
琴生。側身萬里毛生刺。滿目滄江欲濯纓。

贈鄧徵君孝威

不到吳陵歲幾旬。海濱常憶釣漁人。著書閒臥邗江寺。應聘勞窩京洛塵。豈有風雲容白髮。且看煙月老  
垂綸。藏名自昔辭文藻。莫使長門買賦頻。

柬鮑乃茲山人

石帆約過五琅西。策蹇驅車到日齊。作客誰憐雙白髮。拜人同曳兩青藜。雨晴蘭谷松風冷。露重花宮桂  
影低。老滯窮途易愁思。月明莫惜酒頻攜。

九月三日雨中過夏開之道院聽徐瓚公彈琴

向夕山房踏雨尋。蕭森秋色滿幽林。到來非戀遠公酒。不去因耽中散琴。蘭葉未殘香可佩。木犀初放醉堪簪。重陽還聽南薰操。懶賦龍山吹帽吟。

四憶詩 并序

四憶之作。懷賢也。人豪閒出。雖進退不同。各有真氣。以光垂裳之化。宜君太原富平。皆舊遊。惟蔚州未識耳。四君子文章事業。孤忠讜論。皆足炳燿一朝。輝映千古。余客紫琅。兩窗漫興。用誌欽仰云。

魏總憲象樞

魏公垂老振清風。輦下人傳避玉驄。察典仍充都御史。加恩並領大司空。憂時袞職誰能補。獨立中朝未有同。常欲披帷瞻紫氣。白頭留滯向江東。

楊觀察素蘊

字弱玉。號筠涓。陝西宜君人。

伏闕陳詞動世皇。避嫌歸去賦滄浪。滇藩拒命推冰鑑。楚幕談兵備漢襄。烏府昔曾陪曲座。鹿門何日望周行。洛關廿載分攜地。江海鱗鴻正渺茫。

傅聘君山

雙箭飛書古仲連。違時王屋臥寒煙。山中自煉長生藥。闕下誰登啓事箋。白刃蹈胸臣節苦。黃冠歸里主

恩全松莊霜月千秋白。雙眼乾坤願執轡。

李檢討因篤

玉殿春風放露桃。千官鵠立望揮毫。九天睿藻掄高第。十里名花看錦袍。珥筆嬾嚮朝北極。蒼幃泣請待東臬。涇溪歸臥休垂釣。莫使宸旒物色勞。

憶內

辭家曾向小樓期。約放黃花共舉卮。一自渡江淹倦客。遂看叢菊滿疏籬。授衣海上傷遲暮。搗練閨中怨別離。霜白五琅鴻鴈少。更於何處寄愁思。

同吳仲子過王氏園亭看菊

秋老何堪更異鄉。消憂聊復問滄浪。菊畦全似陶潛圃。茗椀疑過陸羽莊。闌外繁叢遙送色。屏中細蕊漫浮香。不嫌白髮疏狂客。載酒還來就草堂。

霜降前一日吳仲子過訪小飲

樽酒相將下夕扉。丹房靜夜一燈微。五山雲冷懷鄉夢。九月霜沾羈旅衣。風度戍樓銀箭促。路迷海徼鴈書稀。逢君醉裏傾曠昔。白首空嗟身世遠。

邗江贈徐健庵學士

記擁雙旌問野扉。同尋大令醉斜暉。眼前故舊憐余在。海內交游如子稀。寒菊一叢霜外老。黃河孤櫂雪

中歸相逢且買邗江月。回首兵戈事事違。

### 車騎關

太行落日暮山多。低嶺分關界兩河。百里望鄉回白首。半生作客付長歌。青青煙草迷沙磧。寂寂春林帶女蘿。傳是信陵符合地。野農耕出古彫戈。

陝州 河南府內古虢國地。

虢國雄藩枕澗瀟。雙橋激石水淙淙。黃河東束龍門下。紫閣西瞻太華連。界入周疆分陝地。城臨曲沃戍秦邊。欲尋魏野幽棲處。遠樹蒼茫起暮煙。

潼關 關在陝西西安府華陰縣。

雄關百二羣咸陽。夾水盤山引大梁。遠岸樹浮蒲坂綠。大河煙接海門蒼。畫疆漢業分三輔。控險秦人困六王。七代車書天府地。朝宗自昔號金湯。

### 登西嶽廟萬壽閣望太華

巍巍傑閣壯金天。老檜陰森覆古泉。寶地燒丹開漢武。露盤擎掌降神仙。危闌華嶽三峰矗。畫棟黃河一線懸。他日撥雲朝白帝。青藤扶上玉花巔。

聞黃鸝 時客武功署。

晚暑風微落日低。瀟瀟雨過美陽西。閒看烏燕層雲下。忽聽黃鸝深樹啼。棧閣兵戈明夜燧。漢川輸輓困



殘黎憂時白髮秦關客。斗酒雙柑興懶攜。

漫興

樞樹輕風落檻涼。綠陰映日灑衣裳。官齋度日惟書卷。客路禁愁有藥囊。萬事漫嗟衰髮白。一觴且對好花香。川南粵北多烽火。誰讀高文弔戰場。

立秋日雍原晚眺

雍原秋色正西來。多病驚秋晚上臺。秦塞河山餘亂石。漢宮樓榭隱荒萊。城邊暮景炊煙合。雨後晴峰夕照開。客舍閉關經歲月。強扶竹杖自徘徊。

曉起竹下

曉起西風相與清。紅雲東光望海生。高林日射飛禽散。低嶺煙迷牧犢鳴。粉堞悲笳愁伏枕。蒼藤白栝滯寒城。獸憐徑外琅玕色。孤影蕭疏似客情。

長至日

邨城雪後見陽回。戰伐三川鼓角哀。析骨已看民力盡。徵兵猶報羽書催。曦和漫說生暘谷。客興誰堪問酒杯。雙眼憂時衰總暗。何年一向太平開。

辛酉立春時庚申臘之望日也。

津水陽回臘漸殘。三川戰氣送餘寒。那堪歲盡鄉猶隔。耐可春生客未還。誰把椒花娛白髮。何如竹杖老

黃冠。卽看秦嶺瘡痍。徧縱對鶯花興未闌。

元夕望周原感興

簫鼓西崖晚更喧。白頭閒仰倚層軒。游人塞曲兼秦語。土俗周原稟上元。后稷祠前星欲白。姜姬塚外日初昏。看燈步月渾無賴。腸斷歸期獨掩門。

發武功歸里

官齋夜夜夢青山。萬里洺漳此日還。野色乍看清倦眼。林花真欲浣頰顏。開籠羈鶴寒風舞。出岫孤雲倚樹閒。歸臥林園棲隱地。南華一榻掩松關。

驪山溫泉

城下靈泉萬木閒。客來踏雨問青山。離宮雲散笙歌冷。翠輦香沈徑草閒。游女祓祛喧笑語。翳林池館響潺湲。金塘蘭室無消息。逝水千秋向海還。

靈寶道中

不因久客感蹉跎。笑攬刀環日放歌。赤水臨關秦地盡。黃河隔岸晉山多。飯牛豈合終人下。題柱曾聞擁傳過。少小亦懷投筆志。獨憐衰白困漁簑。

雨後過李羽士鶴巖道院

雨後花宮負杖過。疏篁叢卉蔭藤蘿。雲閒老眼看猶懶。秋爽新詩著已多。靜苑游蟲羣聚日。野塘花鴨鬪

穿波莫嫌市醜貧難賁。鴈過天高正荷戈。

過外氏別墅 時內弟物故林僧還眞亦棄世。

前朝客舍老重過。四十餘年嘆逝波。衲挂風林蕉入夢。劍懸墳樹磴登歌。空梁燕壘封蛛網。密葉鴉巢蔓女蘿。昔日鄰翁三兩在。相逢失笑淚婆娑。

黃遜庵留寓留笏堂 時遜庵以六合令卓異候補部郎。

鼻異朝天幾日迴。相逢笑指菊花開。林中還下南州榻。江上常懷北海杯。令尹誰登循吏牘。郎曹好展軼羣材。回思宦迹風波險。且臥林園起舊醅。

游襄陽投贈楊大參筠涓

洛關別後復何依。白髮漳南臥釣磯。短櫂客來清署迴。埋輪人去諫書稀。不辭冰雪憐同調。兼愛湖山訪翠微。廿載心期相憶處。林中常著舊緇衣。

壬戌立春

洛漳別去幾經旬。歲晚江干白髮人。節序尙餘三日臘。風塵又見一年春。沈雲釀雪寒仍劇。細柳新花色未勻。回首半生渾作客。鄉思不復更沾巾。

元旦之二日周總戎吉臣夜過楊大參筠涓署招同俞崖庵副戎管蘊赤別駕宴集

令節江城散暮雲。春衙官散日爲羣。禮寬雅會客長揖。醉引清機半論文。好客關西荆憲使。工詩細柳漢

將軍湖裏經緯頌公等宵旰憂勞總未聞。

寄鄂都令張九苞

二難文采重西京。令弟燕臺附素盟。兵火封書愁去鴈。湖山何日賦鳴鶯。訟庭吏散羅堪設。戰地春深棘半生。聖主已懸巴蜀慮。好將撫字慰皇情。

送張六翮之任大竹

余與六翮由方城攜至荊州。六翮自蜀江買舟西行。余擬東下武昌。

廿年契闊嘆蓬游。漢上相逢笑白頭。萬里巴川歸匹馬。一官灑灑復扁舟。仙人樓上杯誰並。神女祠前雲共愁。聖主只今求故劍。分攜莫更重離憂。

春霽登襄陽昭明臺懷古三首

帝子高樓莽劫灰。江天春色引登臺。九方戰氣煙中盡。三楚雄圖檻外來。不見龐公棲隱地。猶傳元凱濟時才。百年興廢空搔首。飄杳衡陽去鴈哀。

雙江梅柳淨朝暉。峴首風烟擁翠微。墮淚未殘人已去。荒池半圯世全非。晴春花鳥堪乘興。倦客湖山未拂衣。倚杖層闌發清嘯。鄉關飛夢落漁磯。

雲落長林暮景懸。春山誰道有龍眠。只看羽扇從軍日。已識巴川祀漢年。老去不堪傷往事。興來聊復問幽泉。只今四海無征戰。覽勝還尋赤壁船。

送楊尹公文學省親歸秦

野樹天桃落漸稀。憐君多病伴春歸。輕塵撲面江風軟。弱絮沾衣塞雨微。夜館青燈迎倦客。暮閨白髮倚慈幃。太行西望秦川近。六月關門有鴈飛。

俞副戎餞飲署齋

江城明月照離筵。欲賦騷歌亂管絃。落拓依人遊北地。窮愁猶子滯南天。大隄行柳拖春雨。硤石繁鷺弄晚煙。晉樹楚雲幾千里。悠悠執手是何年。

宛南奉別周總戎

江城垂老感知音。別後雙魚記憶深。雪壓夜闌呼綠酒。香焚華館聽朱琴。宛南再喜陪游履。洛北空憐隔暮雲。握手不堪唱三疊。離堂衰白易沾襟。

郊郛道中遇雨呈楊憲使

細雨輕風送曉涼。山雲澗樹遠蒼蒼。市橋宿溜行猶滑。驛路殘花溼尙香。爲戀交游還適晉。豈緣衰病漫懷鄉。百年潦倒泥塗裏。酒盞詩筒興不忘。

游龍門寺登尺天閣二首

峇嶠峭壁插青空。劃出諸天奪鬼工。寺有石洞。石佛大小數萬尊。傳聞山劈現出。支遁不逢機總息。公輸信巧技全窮。雨花半落孤

雲外。瀑水常鳴斷壑中。偶上層闌挹煙景。飄然只欲御長風。

山樓窈窕斂朝暉。近砌方塘夾紫薇。臺下靈泉穿石竇。松閒幽鳥弄天機。時聞梵磬飄珠界。漸覺曇雲浣

客衣傳道祇林由化現。何人過此不皈依。

天井關遇雨

千盤危磴陟岩峽。上帝靈居望不遙。自識長平稱險塞。由來天井出層霄。半空過雨喧山瀑。陡壑填雲漲海潮。羸馬抱鞍防墜跌。百年魂斷幾時招。

請告允書懷

百年今喜謝儒衣。垂老生涯有釣磯。自分無才安薄福。非關求道悅清機。北山未敢勞文誥。南畝猶堪荷黃歸。莫笑棄瓢渾細事。累人不盡是輕肥。

次柏人投贈魏貞庵相公

長安別後老垂綸。落拓孤踪缺素鱗。梁月離懷憐白髮。鹽梅勳業著丹宸。留侯辟穀非辭漢。太傅團碁已破秦。海內蒼生正翹首。五雲旦暮有蒲輪。

魏貞庵卽日招飲

從返東山道益尊。樞衣曉閣聽高論。爲憐客倦分秋宴。非壓塗窮掃相門。莘野田園供杖屨。午橋花月伴琴樽。後期訂約梅開候。一榻留懸葆石軒。

葆石魏公堂名。

中秋夜晉署楊立三招同蔡君常楊子正小集

西風白露亂秋礎。夜署空階酒並斟。鴈塞天高明月滿。狼城木脫遠煙沉。百年書劍鄉園隔。千里關山老

病侵不有故人憐。白髮良宵誰與共羈心。

憶襄陽故人

漢江千里憶從游。命酒題花事事幽。細柳醉歸傳夜騎。晴湖歌動散春鷗。思牽南鴈迴衡嶽。愁對西山賦繫舟。可惜重陽籬菊放。一觴遙把默登樓。

曉起寒甚聞楊學使刻日回署

一夜西風吹齒過。曉看寒色滿庭柯。官齋門掩客來少。旅館臺空葉落多。節近授衣懷滄口。書傳歸旆渡漳沱。東籬漸見黃花吐。九日聯觴好放歌。

楊學使旋署再吟

漳沱木脫鴈飛高。節使行邊簡俊髦。塞上舊蕃千里駿。雲中新識五陵豪。自慚白髮遠游屐。幸未黃花負濁醪。從昔進賢邀聖眷。知君旦暮賜緋袍。

農窗

夜雨瀟瀟驚客心。曉檐霜氣動高林。旁河城郭地多鹵。近塞風雲秋易陰。畏溼平居衣漫曝。倦游老病雪盈簪。官衙漸近重陽日。欲把茱萸何處尋。

九日楊學使署中讌集

山郡秋雲向晚披。寒煙輕裊菊花枝。他鄉正惜茱萸節。命酒猶憐風雨時。四座朋游傾北海。千秋詞賦歷

南皮。醉來莫續龍山興。白髮登高杖懶移。

中秋王襄璞齋中宴集

清宵明月滿闌干。把酒真應永夜看。露氣暗侵庭草澤。角聲隱起戍樓寒。衰年有興還尋醉。憂世無方只自寬。江北江南漫回首。秋光萬里異悲歡。

避兵婦女入城聚泣風雨中甯侍御廣開閒舍安寓之

羽檄喧從大漠還。月氏萬隊度洛關。秋原牧馬空禾黍。夜帳鳴箏列海山。鴻鴈驚來風雨外。啼號聲在水雲間。憂天豸史開旁舍。千葉青蓮濟大艱。

憶胡遜谷久住洛水不歸

羽書日夜下燕關。君向孤城久未還。漫傍黃塵瞻北斗。應穿紅樹詠西山。草堂見慣經過少。酒盞何堪盡日閒。況是亂離俱白髮。早來攜手慰頽顏。

雪中王方伯招同申臬盟伯仲鄭子勉路徵吾小集

寒城密雪亂朝昏。萬里邊雲失曙暉。呵筆自憐吟兔苑。驅車君憶老夷門。冰魚翠盤翻銀鱠。霜橘春纖破玉痕。海內只今多戰伐。偷安聊復此傾樽。

秋感二首

落木寒雲過鴈驚。關心烽火照邊城。花門已見無中策。榆塞何勞召外兵。到處溪山成戰地。幾年蓑笠恣



巖耕空階立。徧秋宵月。白髮悠悠萬古情。  
邶山舊繞鄴城隈。漳水源從汾沁迴。魏武旌旗留戰地。平原賓客起歌臺。蠶叢烽暗巴江冷。閩海秋清塞角哀。三輔由來股肱郡。匡時猶是出羣材。

對雪效東坡體二首

草堂夜雪曉飛花。清景平分處士家。石鼎自開然楚竹。晶鹽旋掃煮蘭芽。朱門歌管圍紅粉。白屋琴書散絳紗。寄語五陵豪貴客。漫將勝事向人誇。  
臘殘飛雪逗陽春。三尺街頭泥殺人。病婦朝炊憎溼葦。山翁曉几拂寒塵。燕窗僵臥看前輩。驢背枯吟見後身。苦樂百年行處有。更於何地覓吾真。

對鏡

老貌從人說瘦肥。偶臨青鏡笑全非。卽緣避俗傷幽獨。肯爲長貧擾息機。甕牖藤牆寒士室。幅巾竹杖道人衣。百年得此吾何慕。碧酒黃柑日掩扉。

除日馬長卿以酒米惠貽

雲淨衡茅落日低。故人歲晚愧提攜。貽將春酒銀瓶淥。佐有香粳玉粒齊。暖胃且憑炊似雪。破愁真得醉如泥。花時好致山翁意。拄杖常來竹徑西。

甲寅除夕

雪霽風微夜色寒。高樓鐘鼓下層闌。一年忙易今宵醉。萬事愁消盡室安。老歷煙霜休漫惜。春尋花鳥日追歡。遙憐楚越兵戈裏。零落湖山不忍看。

除夕胡遜谷見過

曾聞避俗向巖阿。忽訝衝泥問釣箋。袖裏新詩矜自出。城中積雪晚誰過。君能除夕耽懷友。我惜衰年日放歌。野興春來應不淺。常尋草閣醉煙蘿。

乙卯元旦二首

蒼蒼夜色曙光分。靜院燈香瑞氣氳。霽雪漸融寒尙劇。曉鐘欲歇遠猶聞。椒盤一室喧兒女。爆竹千門賀聖君。白首無才臥草莽。欲從啓事憶劉蕡。

湖海兵戈越歲年。可堪垂老亂離前。難尋樂土謀長計。暫處安巢幸苟全。白髮不辭沽酒債。青春擬辦買山錢。太行西去危巒隔。臥傍層雲瀨石泉。

秦警

秦關又報起狼煙。曾敕帷臣撫未還。諸將一時多授命。親王三遣自臨邊。已傳豫楚經年戍。漸見徵求稅俸錢。幽薊古來根本地。軍中誰比亞夫賢。

代贈彭觀察

粉榆世德舊知名。閩海鯨瀾借箸平。異績九霄傳渡虎。新綸雙鉞報遷鶯。繁臺月白琴樽靜。汴水霜高裘

帶清。一臥漳南瞻紫氣。三台光映兩河明。

同胡遜谷申臬盟飲王方伯齋中

那堪垂老厭兵戈。愁掩柴門臥知蓑。誰許野翁山並買。且尋酒伴醉同歌。嚴城鐘靜人行少。絕塞峯高戰氣多。落落吾儕俱白髮。何妨花月日相過。

胡遜谷攜家郊居寄訊

城中盡日掩柴關。今復攜家出市闌。豈爲幽林招小飲。應尋僻地老餘閒。牆陰芟草新移竹。屋角開窗舊看山。張谷西連太行路。莫教深入不知還。

鄭司直自秦中歸寄此問訊

曾聞諭蜀下秦川。會見黃雲靖塞天。豈有將軍真跋扈。遂勞敕使罄金錢。轉輸已覺蠹叢阻。士馬終虞劍閣懸。欲傍雙旌問消息。城頭夜色起蒼煙。

申臬盟晨走小童送牡丹兼致新咏二首

溪堂四月牡丹開。帶露侵晨折送來。新咏曉題香並遠。名花坐對賦應裁。多愁况復驚鼙鼓。違興何妨問酒盃。草閣蕭然塵事少。一瓶紅翠拂窗迴。

百年踪跡半塵沙。常過三春不見花。且把稊柯供醉眼。漫憐雙鬢負韶華。長風山閣吹邊燧。暮雨江城咽塞笳。幸與故人俱故里。晴園莫惜酒頻賒。

遜谷鳧盟季白雨後過草堂

山翁曾許住山扉。晨語山妻煮蕨薇。自識交情貧較久。敢言服教老知非。苔痕積雨階全綠。桐影矜秋葉漸飛。海內烽煙看日促。清樽莫遣興多違。

偶至賞蓮亭

城邊水閣白雲隈。長夏探幽上露臺。蓮浦葉敷花未放。槐堦風好客頻來。避喧玩物聊詩卷。多難關心罷酒盃。坐愛沙汀看浴鷺。無心飛去復飛迴。

與遜谷約訪子勉阻雨不果

谷口曾期問子真。滂沱隔巷沒蹄輪。衝泥未可隨孤杖。失信還應恕老人。西閣浮雲留屐齒。南池積水浸苔茵。最憐良會空搔首。可有幽懷入賦新。

鳧盟以青桐子見貽並致新詩

青桐秋實子垂垂。別有幽香靜者知。侵曉折來連葉露。新篇裁並寄山籬。渭川自羨林中筍。錦里分茹石上芝。此味世人多不解。中冷洞芥總相宜。

送于隆九進士謁選入都

老臥塵沙間素期。恩恩握手欲何之。未陳粗糲慚疏簡。纔對壺觴奈別離。關塞黃雲迷赤羽。江湖白雨溼朱旗。知君謁選瀛臺日。應有雄文策御墀。

易園小集

風吹溪上草堂閒。一枕羲皇晝掩關。過眼憂虞餘白髮。驚心烽火戀青山。湘簾晚映晴霞動。海燕羣銜暮雨還。竹杖夜深扶月影。夢迴疑臥水雲閒。

晚集王廣生城南別墅

草閣風微夕苑涼。門通半壑卽滄浪。爲留漁父陪高話。旋集林翁共舉觴。雨散遠山生晚翠。月搖芳樹動幽香。只今海內兵戈滿。白髮何人臥醉鄉。

郊居二首

拚老幽林不問年。數椽茅屋古漳邊。輓轡舊灌通溪圃。櫛柳新栽近舍阡。從識流光同過客。誰看白日有飛仙。山窗睡足花陰午。伏枕閒翻秋水篇。

關塞秋風正控弦。知幾擬辦買山錢。長貧客至慚賒酒。多病詩成懶拂箋。豈有魯連真蹈海。聊同杞士漫憂天。何年息戰西成美。牧犢沙原響暮鞭。

獨酌

清秋雨後夜涼深。滿目西風酒自斟。豈謂憂時孤好月。且將衰鬢寄微吟。井梧露重陰初白。銀漢天高影漸沈。萬戶寒衣催翦尺。鼙聲折盡玉關心。

千佛寺漫興

珠林落葉迴空山。過雨苔華滿徑斑。初地暫留塵外賞。浮生久識此中閒。香臺影會燕辭舍。石磬聲沈僧閉關。盡日高吟弄秋色。白雲疑到虎溪灣。

秋感時寓千佛寺

西風颯颯旅魂孤。老臥招提病欲蘇。玉塞霜高催過鴈。珠林日落亂栖烏。不將白髮彈魚缺。且挂青錢問酒罏。最是阮公能玩世。百年沈醉一愁無。

客鵝城將歸平千留別夏明府

西風漸覺動高寒。向老經秋作客難。蕭寺聞鐘常少寐。泥塗貰酒不成歡。清齋日耗官廚米。多累慚供安邑肝。寄謝鵝城賢令尹。欲將衰鬢溷漁竿。

蒸米羔熟走童子分饋遜谷鳧盟兩老友

秋日山廚炊黍香。敢因粗糲遂先嘗。筠籠自愧提攜薄。棗餌能扶臟腑強。肉食古人曾示戒。芹羹野老亦相將。呼童分餉雙林叟。茗椀盤餐對夕陽。

清源道中遇雨懷寄劉雲麓刺史

高唐勞吏意如何。十載江湖隔玉珂。念別可堪閒有賦。相逢那得醉無歌。官齋雨裏細梅吐。驛路春融芳草多。一臥泥塗隨化轉。莫將客鬢感蹉跎。

東郡光岳樓懷古二首

光岳樓高起暮寒。乾坤戰伐此憑闌。不堪多病懷烏几。詎有繁霜上鷓冠。平野春雲分岱色。長林繡影隱江瀾。烽煙秦楚無消息。楊柳青青眼倦看。  
灤川草色接青徐。近市樓臺水竹居。萬里風雲喧鼓角。百年鬚鬢老樵漁。故侯不見城邊壘。野老空傳箭上書。巢父墓田芻牧散。憑高回首幾躊躇。

自東郡歸高唐作

鹽車無復相奇毛。愁比三閩賦漢皋。抱瑟漫勞遊渤海。論心何處訪荆高。羞將老眼看垂囊。賸有春塵冷敝袍。不遇魚邱賢刺史。消憂誰與市香醪。

行抵高唐仍用前韻

老向塵沙歎二毛。春花春草滿晴皋。林風亂擁村煙出。曉日遙翻塔影高。厚祿幾堪存縞帶。故人空憶戀綈袍。何如歸臥漳邊閣。閒引鄰翁醉濁醪。

劉雲麓刺史招同劉公定明府于待公將軍成小西宴集李氏園亭

晴郊樹樹鳥關關。共對春光散旅顏。莫惜俸錢沽綠酒。且招詞客醉青山。百年過眼俱陳跡。萬事於今好是閒。試問秦川楚水上。花開花落幾人攀。

留別劉雲麓刺史歸漳干

山翁野性似山麋。老至新詩到處題。常惜俸錢爭六博。許乘廐馬醉銅鞮。三春清暑容高枕。一釣蒼烟憶

舊谿把酒夜闌明月下。空階久坐惜分攜。

余旋聖別文仲姪

泥塗空惜鬢華添。纔說先歸淚欲霑。汝在少年懷鳳舉。余甘泉石愧龍潛。深燈夜署書抽架。濁酒溪村月滿檐。午日柯亭槐影下。蒲觴待子韻同拈。

逢張石周

世事浮雲自古今。獨憐風雨間招尋。乾坤落落吾徒在。江漢悠悠感慨深。縱飲記拚前代醉。高歌無復少年心。遙山日下荒溪暮。煙鳥歸飛戀故林。

步金遜庵韻二首

不將窮達問流年。坐愛孤雲入遠天。踏月偶隨煙外磬。看山時拄杖頭錢。自嫌瓢在非真隱。人許詩成是謫仙。草閣蕭然塵事隔。窗中自註養生篇。

雲起溪迴路漸窮。交飛白鳥夕陽中。遙林虹飲溪南雨。孤杖襟開松下風。老去耽幽詩尚健。人來問世耳雙聾。偶過林下逢徐孺。倚杖清談對碧空。

寄申冕盟

持竿何處避徵車。品第高風古不如。掃石寒巖秋坐月。看雲絕澗曉擔書。夕陽杖底穿喬木。落葉村邊掩敝廬。君向桃源塵事隔。可聞烽火徹南徐。



白露望漁浦兄不至

會約西風返釣磯。滿亭黃葉鴈來稀。清漳懸淚分華鬢。白露他鄉尙葛衣。占夢曉尋康節數。倚門宵冷北堂幃。烽烟幾處驚遲暮。目斷秋雲正落暉。

送孫右漢歸沙麓

塵中一劍老星文。洒洒繁臺此送君。闌外松篁晴奏律。沙邊鷗鷺晚呼羣。不堪多病淹歧路。真羨歸途踏野雲。梁月懷人應有賦。雙魚莫厭遠相聞。

久客

久客他鄉倍憶家。他鄉又復汎孤槎。鏡中雙鬢星星雪。樓外澄溪岸岸花。吳市笙歌喧子夜。潼南雲水隔天涯。可憐老去歸無計。常對芳樽起嘆嗟。

贈馮胎仙學士

時治河徐州。

記別西清二十年。江湖蓬鬢半皤然。池邊憶對黃花酒。河上重賡白雪篇。底績勞臣看卜相。彈冠老友羨登仙。東堂舊是君家地。矯首阿衡帝座前。

聖駕南巡紀事

幸金陵

巡游萬乘幸鍾山。歲晚江南春色還。劍佩夾城羅彩仗。旌旗分道引仙班。衣垂露盤蛟龍舞。扇擁雲屏孔

雀閒曾敕侍臣休警蹕。兒童亦許識天顏。

祭孝陵

有明太祖陵

孝陵自昔兆留都。憔悴松楸玉寢孤。龍祀九霄傳法駕。歡聲四海慶嵩呼。追崇宣聖垂鴻範。賜奠先朝啓燕謨。自是唐虞敦德化。千秋禮樂丕皇圖。

較射

九關初闢五雲高。快靚鑾輿服鞬囊。天際晨星明豹尾。柳梢曉日射猩袍。開圍驟騎拈金鏑。行殿昭容奏玉璫。豈謂太平忘武備。臨戎無那聖躬勞。

回鑾

五月行邊見鴈來。南游又指嶺梅開。兩宮定省牽宸念。萬里冰霜促駕迴。月落龍帆移泗水。雪殘鴛序望瀛臺。巡方亦是先王事。肯間椒盤行慶杯。

正月廿八日陪學使楊公游雙塔寺二首

城外風煙接混茫。春寒溪柳未全黃。晴郊客仰看山眼。良日官閒問野觴。寺近影懸雙塔迴。冰消聲帶一川長。已拚身世隨蓬鬢。不把浮生問法王。  
跌坐禪牀轉夕曛。茶聲松籟上方聞。香臺古木連青嶼。梵閣曇煙拂紫雲。初地春閒誰過賞。勝游今始對論文。前賢壁上留高咏。一代詞壇拜子雲。

新雨憶內

絲絲小雨淨春塵。沙徑浮青迴細茵。有客幾時辭晉水。無家何日出迷津。鄉園紅杏花空落。行柳黃鶯聲乍新。豈不懷歸傷遠道。好留憔悴待游人。

留別楊學使先生

橫汾煙柳雨霏霏。白髮湖山憶釣磯。憲使行遷新袞職。野翁終戀舊緇衣。三年從事慚何補。半壑高眠老欲歸。比視瑯闈秋月滿。扁舟雪櫂興無違。

贈張楓臣孝廉

廿年詩酒罄交歡。共倚雙桐賦考槃。我病自憐猶泛梗。君才誰許老漁竿。兩朝文獻家聲美。四世科名帝賚寬。他日鳳池懷舊好。衰翁不復慶彈冠。

答張九達太學

江湖擾擾尙烽煙。纔聽驪歌意悄然。海內幾人存白髮。塵中空惜擲流年。辭家老倍牽兒女。作客貧常負酒錢。秋上石帆山頂望。期君同汎燕磯船。

訪張天池友人兼訪楊觀察筠涓

裴子巖邊新卜居。六年烽火斷音書。相逢應訝形容老。失路真慚義氣疏。戰伐何方尋樂土。饑荒吾里漸邱墟。峴山若遇羊開府。憶否漳南舊隱廬。

亳州懷古

千載桐宮事渺茫。桑林不見古宮牆。一從銅馬來三楚。遂決金隄灌大梁。樓觀競開渦水市。舟車半引汴京商。兵荒遠道傷興廢。客淚鄉愁滿夕陽。

道經懷遠

嵐光霽色滿西灣。遠道悠悠未可攀。浸郭蒼波分二水。夾城翠色擁雙山。邗關潮汐浮雲外。淮口帆檣落照間。不爲長途甯負此。定教醉咏不知還。

宿長淮衛望中都懷

星分地列斗牛旁。遂建中都啓大疆。興廢百年空涕淚。兵荒萬井半流亡。已看王氣沈淮泗。莫按雄圖指鳳皇。石馬荆榛煙樹遠。長淮無際水茫茫。

道經鳳陽

飛樓縹緲海雲孤。山頂星壇定有無。不信青田占氣象。還教赤縣變莓蕪。瑤臺歸鶴悲遼水。玉寢啼鶻拜鼎湖。聞說梵宮遺寶衲。月明珠樹不栖烏。

贈六合黃遜庵明府

東堂世業五雲邊。帝賚雄州簡大賢。遂有裘章褫禁地。會看飛鳥覲堯天。窗中山落靈巖樹。城下江通瓜步船。自笑漳干老詞客。白頭來索草堂錢。

己未端陽前一日黃石筍先生招游果老灘之符采閣

梵刹仙臺竹樹圍。到來片刻卽忘機。輕風自送江帆過。高閣時看山鳥飛。明滅河流斜日動。微茫巒翠暮煙霏。明朝午日還乘輿。菖葉榴花醉不歸。

游六合永定寺

煙水風林自一邱。石橋斜日上方幽。畫闌曲徑僧相引。敞閣疏篁客欲留。拄杖漫驚松下鶴。迴船遙起荻邊鷗。近城幾處明漁火。攬勝真成盡日游。

喜雨 戲爲俳體

僧苑滂沱盡日聞。高天向夕未開雲。時逢久旱如甘露。禾遇噓枯比救焚。萬井凋殘生起色。三農踴躍忘辛勤。懸知故里同霑足。欲續眉山喜雨文。

渡江二首

迎帆風蹴浪華明。隔岸羣山隱石城。不爲困窮誰問渡。獨憐衰病尙孤征。纜牽荻葉蕭蕭動。櫂撥江波泯泯清。向夕鄰舟吹玉笛。梅花淒斷不勝情。

秣陵城外草煙萎。燕子磯邊落照低。舊嶺戒舟懸鐵鍊。新洲橫水作金隄。天涯白髮心全折。路入滄江意總迷。欲向鳳凰臺上望。鄉關千里暮雲西。

客金陵寓朝天宮於道士房字貞生

江天明月滿花宮。詎信蓮壺有徑通。石級逶迤穿洞壑。藤牆窈窕隱房櫺。吹笙鶴下瑤臺畔。聽法龍歸金瀨東。常欲尋仙問丹訣。無如高臥此山中。

游太平奉贈王欽四明府

東南山斷見江城。城下江光一望明。吏散登樓惟嘯咏。客來洒酒盡生平。彈琴臺畔花爲縣。飛鳥雲中玉作笙。久識汪陂千頃碧。可容羈旅濯塵纓。

客太平寓滴翠山房王起貞道院

赤城丹閣瞰西山。極目煙巒襟帶間。一攬松雲心總適。偶移枕簟夢俱閒。天香不逐輕風去。海鶴時聽夕磬還。羽客古稀仍過二。蕭蕭鬚髮不曾斑。

許我位憲使按部刑州相值客次奉獻一律

雨後空嵐開柳煙。滿溪春色伴巡邊。帶裘輶略今羊叔。山水文章漢馬遷。拂道鶯花迎翠節。前驅甲杖照晴川。不嫌野服陪參佐。酒洗峯苔勒續旋。

澗池道中 澗池縣名在河南

韶峯迴合向三秦。澗水東流入孟津。土穴半傾留古竈。山城未掩斷行人。欹斜石磴雲邊路。潦倒泥塗夢裏身。回首洛漳千里外。鄉心何處問雙鱗。

陝州道中

土峽邇迤向號城。山程漸下路初平。側看陡壑千尋黑。仰視青天一線明。江海經游心尚悸。岡巒歷險夢全驚。東西浩蕩還如此。白髮蕭蕭愧此生。

潼關

蜿蜒雉堞引雄關。西望咸陽杳鶴間。曾識真人飛紫氣。難尋睡叟買青山。拂雲樹送蒲津綠。渡馬船從渭水還。秦漢車書通萬國。河流九曲向人間。

渭南客興

用摩詰韻

客館樓臺清渭曲。南山晚對畫闌斜。晴風欲動河橋柳。煙水遙連杜曲花。一釣滄浪漁父櫂。幾叢竹樹野人家。洛關東望鄉園隔。渺渺浮踪益鬢華。

對雨

晚暑輕雷送雨過。深檐無奈客愁何。年當遲暮歡娛少。人在風塵感慨多。故里昔來仍旱魃。荒田難遇此滂沱。洛關東望空搔首。白髮蕭條懶放歌。

天台令王雨若被勅

宦海風波事難兵。戈輪輓向誰寬。貧遺患難身何補。老憶交游淚不乾。世外慚余猶作客。古稀怪爾不辭官。秦山越水看無極。手抱彈文步曲闌。

七夕

小苑風微晚。暑間蕭然白髮滯秦關。曾無尺字來荒徼。漸有秋聲動暮山。銀漢玉環涼素影。畫樓金縷動朱顏。遙憐兒女穿鍼處。應卜長安計日還。

同朱香侯金柔則小飲

戍樓哀角動黃昏。客與霜銜對一罇。到處狂歌惟短缺。何年賣賦入長門。玉繩寒帶窗前月。草閣常懸水上村。不遇吾曹伴離素。窮途蹤跡向誰論。

同李蒼雯霍耳公霍菊水遊小五臺寺二首

城邊晴雪靜朝暉。臺上風煙接翠微。近市何人開寶地。名園自昔傍朱扉。寺屬晉潘南苑名金粟園。漫憐遲暮淹歧路。幸

引朋儔賦探薇。罷酒憑軒望山色。空青撲檻浣塵衣。

雪苑繁華望渺茫。朱林仍繞漢宮牆。園中金粟留鸚鵡。閣上瑤笙冷鳳凰。斷續朱闌圍落葉。傾欹曲徑引寒塘。老僧猶記興亡事。漫煮山泉話夕陽。

代壽劉司李木齋

畫檐晴雪綠檐梅。書鑄窮巖淑氣迴。調藥鼎邊黃鶴下。懸蒲庭外白雲來。徑留好月遲佳客。酒汎朱霞作壽盃。絳帳千秋陪鯉問。每依南極望三台。

雨中簡呈滿求先生

夜雨滂沱午未休。沈雲低壓檻花流。攤書老眼臨窗暗。久客羈心入髮秋。怨溼山鳩啼暮樹。避人幕燕響



金鉤白頭忝竊藩侯禮。日有香醪散旅愁。

寄徐原一米紫來

朔風吹雪滿西山。歲晚并州客未還。馬服月高塵夢冷。鴈門霜壓夜笳閒。狂歌日費官廚酒。短鬢空凋旅鏡顏。何幸他鄉得徐米。談詩曾許數追攀。

元日

霧影晴光藹曙暉。隔簾春色曉霏微。梅花香落金瓶冷。菘菜盤生玉甲肥。八鬢霜痕憐客路。驚心歲序憶庭闈。十年蹤跡風塵裏。愁對椒觴事事違。

# 玉暉堂詩集卷五

## 五言絕句

路逢故鄉人

路逢故鄉人。笑語秋成好。但問親與鄰。不敢及老小。

次湯陰武穆祠口占

大義申千載。奇功困一時。衣冠尊異代。不敢謁公祠。

觀雪石畫竹

雪石掩長袖。曉窗掃孤影。霜毫四五動。忽覺春齋冷。

古意二首

落日在寒樹。眼看黃葉盡。蕭條歲將殘。狂夫杳無信。  
落日在寒樹。昏鴉繞樹飛。物亦戀柄託。狂夫不知歸。

七言絕句

蕪湖泊舟懷湯崑夫隱君

潯陽東下楚山分。中有幽人臥白雲。明月滿江人不見。西風寒笛夜深聞。  
采石吟

岸上清歌岸下船。曲終愁思滿江天。忽添幾點秋江雨。卽在鄉園亦黯然。

秣陵吟二首

江波無際帶秋煙。渺渺孤槎欲到天。故里那知江上客。白雲紅蓼對愁眠。  
蘆荻蕭蕭白露秋。多愁不上闕江樓。數莖短髮塵凋盡。萬里浮雲一葉舟。

棘溝吟

棘溝村舍枕江隈。樹裏柴門逐水開。十里沿流誰種竹。陰森秋色入船來。

儀徵縣

落日扁舟出郭門。先公遺澤頌江村。當年父老凋零盡。誰識平原白髮孫。

金山

樹色山光倒影青。十年曾此煮中泠。曉帆忘向山根住。昨夜蕪城酒未醒。

歸舟過廣陵寄鄧孝威聘君

吳陵西下憶同舟。十月靈巖孰勝遊。帝子樓中寒夜永。校書典盡驢騶裘。

時孝威校書文選錄。

塞上曲

萬里嘶嘶下玉關。前軍已渡賀蘭山。城頭一夜吹羌笛。多少征人掩淚還。  
宿白洋孫子攜酒見顧

舊游常憶白洋多。華髮南歸此重過。惟有孫郎攜綠酒。翦燈爲爾發長歌。

經寶松濤園

茂林修竹舊同游。五鹿詞人半土邱。滿目松風人不見。寒煙落木隱朱樓。

經孫右漢別業

近郭巢雲一樹幽。與君詩酒日追遊。桐鄉一別成今古。悵望高廬涕欲流。

歸里武功柳明府餞飲春衙卽席口拈二首

細雨離堂唱渭城。座中有客去西京。不須按拍翻三疊。遮莫青衫淚已盈。  
咸陽爲客歲將週。明月魂飛故國樓。行過灞橋看柳色。斷腸回首憶并州。

馬嵬驛

一代紅顏志不違。馬嵬何惜彩雲飛。獨憐白髮秦關客。落拓春風匹馬歸。

函谷關

關尹求仙去不迴。秦碑漢碣半蘼蕪。青牛紫氣無消息。近水桃花幾樹開。

雨中澠池道中見山桃樹

驛路天桃也自紅。獸披叢棘怨東風。空山可惜無人賞。零落花枝暮雨中。

渡河詞

沆漭河流赴海迴。風塵自媿客頻來。舟人笑問曾相識。只是年年鬢髮衰。

硤石珍珠泉

亭下方塘漾石泉。水光倒噴夜光圓。秋清霜落空山冷。應有驪龍抱月眠。

七岔路橋

長堤夾柳向秋城。曾看桃花戴月行。偶識兒童頭半白。小橋流水夕陽明。

新莊橋

少年猶記數追游。醉纜歌船上小樓。當是豪華成逝水。晚橋猶帶滄漳流。

謁先賢子賤祠

祠即古琴臺舊址

郭外靈祠綠水邊。先生遺澤已千年。後來漫說追芳躅。只解彈琴也自賢。

鏡歌十首 有引

滇蜀蕩平。普天胥慶。王師奏凱。取道荆襄。臣湛漢水一棹。喜太平之重觀。天門萬里。獻蕪頌以無

從。恭紀鏡歌。用揚神武。

滇蜀機槍一戰空。神謀萬里樹奇功。瀛臺日麗開麟閣。多少雄姿入畫中。

王師十萬錦雲屯。蕭蕭旌旗指帝關。灑瀆狂瀾爭效順。千帆無恙下荆門。  
地轉陵夷路漸平。雲邊回望錦官城。龍媒蹀躞嘶山雪。天散瓊花洗甲兵。  
八載南征玉闕遙。三王軍渡鐵頭橋。滇城賈客安塵市。露布星馳啓聖朝。  
練甲雕弧整隊還。玉鞭笑拂覲堯天。不聞雞犬驚村落。到處壺漿勞凱旋。  
炎海銘勳銅柱標。伏波馬上繡團袍。已聞函首傳丹陛。輦下爭看縣白旄。  
游魂早見散潢池。轉粟輸芻四海疲。放馬歸牛逢道泰。春犁戴雨向東菑。  
禁旅還家錦作衣。翠樓柳色喜人歸。滇南烽靜銷金甲。莫更含情倚暮扉。  
皇仁賜酺萬方歡。大將承恩宴紫鑾。親解御衣旌血戰。醉乘天廐出長安。  
雲中玉輦六龍飛。告禮郊壇降紫微。雨露普天沾聖澤。衰翁安穩臥漁磯。

題虎亭驛壁

虎亭驛外草萋萋。亭上平臨暮嶺低。只有驛旁酤酒肆。山姬猶唱白銅鞮。

尼山迴車辯二首

仄磴崑嶽力士開。峰頭一線路紆回。土人競說迴車事。當日車從何處來。  
窮谷人知重素王。空山靈宇啓蒸嘗。但崇鄒魯皆良士。何用紛紛矜杏茫。

擬竹枝詞四首

石家池館似瀛洲。靚女如花映素秋。醉裏清歌豔春雪。嬌鶯不復憶揚州。  
新翦秋衫彈墨香。水田花隱錦鴛鴦。妝成莫倚高樓月。恐化飛雲夢楚王。  
無言桃李自成蹊。冶債由來越水西。只許五湖弄煙月。等閒羞出浣花溪。  
湘裾小蹴半含顰。公子西園賦洛神。斜倚繡屏迴一盼。桃花欲放武陵春。

曉起口號三首

一編窗下蔭藤蘿。日擁羊裘獨嘯歌。昨夜輕雷山雨足。城中四月曉寒多。  
學道深慚問世難。尋常日午未朝餐。衰年味淡山童識。市上賒來一片肝。  
清晨咄咄繞階行。隔舍人呼錯應聲。老妻只道憂瓶盡。夜裏閒吟句未成。

清明詞十首

姑蘇城外木蘭舟。寒食家家上虎邱。兩岸柳煙牽桂楫。一灣春水帶花流。  
幾樹天桃映畫闌。樓頭少婦怯春寒。日高妝罷背窗立。簪上花枝捏鏡看。  
呵呼彩杖繞通津。風俗清明競賽神。繡扇金輿同八座。新聞加級出真人。  
渡僧橋北半塘西。花塢藤牆逐岸低。挾彈王孫憶蘇小。田雞濱問白銅鞮。  
美人畫舫鬪新妝。鳳尾裙拖彈墨香。欲使人看蘭瓣鬢。探身窗外打鴛鴦。  
樓船簫鼓動中流。夾岸爭看老串頭。演罷竹枝誰顧曲。崑腔自昔說蘇州。

十五宮娃杏作腮。蛟羅偷引結弓鞋。猶嫌簾影遮嬌面。笑挂金鈎墮寶釵。  
鶴澗春煙擁梵宮。畫廊曲檻曷天風。浮圖繡帶翻游女。疑有飛瓊下碧空。  
武當巖頭石磴高。游人日暮駐蘭橈。吳姬欲上醉無力。斜倚嬌鬟掠翠翹。  
劍池高望赤欄橋。逝水繁華閱暮潮。獸有生公石上月。雨餘清影靜春宵。

放鶴亭

鶴放千年何處飛。支公亭下雨霏微。偶來坐看春山色。滿徑苔香溼道衣。

商邱道中感吟

鬪雞場起谷村西。驅馬黃塵落日低。復社舊推侯季子。文名擬並大蘇齊。

雪苑詞人久寂寥。城邊商水不通潮。土人競說諸公子。鬪罷山雞吹玉簫。

侯朝宗兄弟皆遊。其子孫日以鬪雞射爲樂。非復文獻家風矣。

淮上吟

漁村茅屋兩三家。綠水蒼山逐岸斜。節序客途近陽午。沿隄開徧石榴花。

有感

曠乾吾里接冬春。五月江秧插未勻。南北流亡二千里。繪圖誰與達丹宸。

宮詞



青草城南罷獵歸。如花宮女解宸衣。華燈前殿催歌舞。一片簫韶雨雪霏。  
雨雪片。吳門新聲也。召入禁中。歌工咸與玉饌。

玉饌傳呼出夜庖。建章宮外月輪高。侍臣遠立聽清吹。惟有鑪煙拂繡袍。

